

四庫全書

集部

欽定四庫全書

石倉歷代詩選卷三百四十九

明曹學佺編

明詩初集六十九

胡儼

字若思
南昌人

述古

圖書出河洛義禹闡幽玄列聖繼有作人文日昭宣仲
尼感鳳鳥至理寓微言自從秦漢來但見枝葉繁寥寥

千載後濂洛探其源紫陽具條理垂裕啓後昆前修去
已遠來哲未有聞瑰辭逞葩艷寧復還本根

又

蒼龍既記錄炎劉勃以興詩書煨燼後禮樂粹難徵區
區叔孫子莫能致兩生守文過謙讓俗吏事章程賈董
失經紀二戴紊遺經遂令千載下擬述徒分爭二儀有
定位八風無姦聲公旦去已遠萬世思典刑

又

屈子變風雅騷經寓孤忠光華竝日月耿耿垂無窮後
賢襲軌轍長卿得其宗招搖臨邛市放曠托絲桐淳風
日以靡齊梁更纖穠遠遊謝紛濁超逸等冥鴻

雜詩

大化運無極四敘迭終始茫茫堪輿間萬物羅戢裏青
陽振其華玄冬抱根柢物理有盛衰人生貴知止譙光
乃自卑至善誠若水昧者徒紛紜達士甘窳訥孰云楚
大夫沉江為至理

又

神龍絕嗜欲靜默藏深淵含和抱真陽珠光燭重玄一朝吐雲氣甘澤沛九天天矯煙霧中變化出自然孰知積精至造化為控搏如何勞生者役役事多端豈復念終始宇宙浩漫漫

又

倉庚鳴幽谷伐木正丁丁春風日載陽時聞求友聲若有一文士促膝論平生對面抗高義中心藏甲兵薰蕕

不同器美色徒傾城世無會心友獨立何訖訖安得玉
川子為爾著門銘

居庸關

出京都兮穹窿雄關峙兮居庸蒼翠兮蒙茸紛苒苒兮
遼風城巍巍兮兩山臨玉塞兮跨高寒車轢轢兮結駟
風蕭蕭兮木葉殷淙懸崖兮珊珊恍鳴琴兮清彈聞仙
人兮昔降遺玉枕兮不刊召韓生兮肅之乃顧余兮一
祭駕黃鵠兮高飛翔薄層雲兮入霄漢皇風暢兮八極

蕩邊塵兮滅熄邀浮丘兮賦詩歌四海兮寧一

過蘆溝

洪流兮桑乾汨盤折兮河灣架石梁兮橫波瀨淺淺兮
激湍白石兮齒齒際平沙兮浩漫攬余轡兮東馳望天
門兮九關雲飛飛兮來迎水泠泠兮山青回飈度兮遠
響生木薨薨兮鳥鳴聲余欲訊兮九河碣石峙兮嵯峨
渺滄海兮無極况凌風兮浩歌

續十二辰

鼯鼠飲河河不乾牛女長年相見難赤手南山縛猛虎
月中取兔天漫漫驪龍有珠常不睡畫蛇添足適為累
老馬何曾有角生羝羊觸藩徒忿憶莫笑楚人冠沐猴
祝雞空自老林丘舞陽屠狗沛中市平津牧豕海東頭
折楊柳歌

昨日看花開今日花已披苦心獨徘徊折楊柳流光如
逝波韶華詎能久

又

燕燕羽差池銜泥巢畫梁雙棲復雙飛折楊柳郎去武陵遊還憶閨中否

又

寶鏡久不磨塵翳如浮雲熒熒當奈何折楊柳中心徒自知寧復論妍醜

四時詞

春風吹簾斜簾開飛柳花美人高堂上見此惜年華年華容易隨春草一雙蛾眉鏡中老

又

碧水汎迴塘
新荷艷曉妝
看花臨綺檻
愛此雙鴛鴦
鴛鴦宛轉迴塘路
相對朝朝還暮暮

又

秋露白如玉
梧桐墜寒綠
文犀鎮錦帷
紅淚消銀燭
銀燭輕搖翡翠煙
孤影熒熒夜不眠

又

落葉深閨靜
零露宵鶴警
玉井凍無聲
夢回寒夜永

夜永銅龍漏幽咽小窗斜轉梅花月

白紵歌

昨日之日不可留飛光迅速如波流嗟嗟少壯終白頭
願及芳時往遨遊吳姬當筵歌白紵清絲急管間宮呂
妙舞低回玉杯舉如何不樂空延佇堂前花開艷春陽
錦屏圍暖羅綺香撾鐘考鼓宴高張美人起舞紅袖揚
滿堂欣欣樂未央但恐一夕秋風涼空自徘徊明月光

江南意

暖風吹游絲飄揚無定向若將比郎心郎心更惆悵看
彼芙蓉花那能媚春華含情照秋水孤芳徒自嗟

結髮行

少小為夫婦結髮誓偕老如何中道間棄置不相保抱
恨匪良圖憂心徒慄慄世上應無連理枝堦下偏生斷
腸草殘妝收玉鏡幽意托瑤琴寂寞深閨裏誰聽白頭
吟

遠將歸

去年與郎別楊花飛白雪今年候郎歸楊柳綠依依聞
郎買船下湘渚日日門前望旅行人過盡乳鴉啼徘徊
日暮空延佇攬衣回洞房對鏡卸新妝那知清漏永
但愛明月光月光照席涼於水帳裏燈花撒紅蕊好事
從來不浪傳明日升堂拜姑喜

妾薄命

妾薄命聽妾歌夫婿輕別離妾心當奈何山有虎豹水
有蛟螭川塗邈悠曷云能來朔風吹衣雨雪霏霏洞房

慄慄神悽色哀吁嗟乎妾顏雖改兮妾心不移

竹枝詞

湖上聞郎歌竹枝湖中蓮艇便輕移畏言郎渡瀟湘水
莫待荷花空淚垂

楊柳枝詞

卷畫樓前雨歇時千絲萬縷綠垂垂無端却被風吹起
撩亂春心不自持

三臺詞

一陣霜風乍起半窗月影初斜寶匣燒殘香篆銀缸落
盡燈花

又

坐穩錦茵重疊醉來烏帽欹斜誰遣青娥鬪月自憐銀
燭生花

次韻胡學士春日陪駕遊萬壽山

扈從宸遊日祥雲夾道紅香風傳別殿飛蓋繞行宮翠
滴千巖滿波迴一鏡空忽看鸞鶴起聲在半天中

又

澗道蒼苔合房櫳繡戶分碧淙晴欲雨錦石煖生雲嘉
樹千尋秀靈蒲九節分廣寒宮闕近天語半空聞

又

雨晴山色好太液暖浮春瑞鯉遙吹浪飛花近着人列
筵深帝幙載筆煥然綸願繼周南頌騶虞詠至仁

又

玉梁凌漢遠朱榭入雲高曲水含蒼霧孤峰聳翠鼇路

迴經月殿賦就賜春醪盛事千年遇登臨豈憚勞

送金諭德扈駕北征

萬乘出居庸前驅度朔風劍光飛電紫旗影照山紅壯
士心如虎將軍氣似虹鼓鼙通塞外烽火入雲中直掃
祁連北還過瀚海東謀謨資俊傑扈從得才雄坐擁青
絲騎腰懸明月弓賦詩橫畫掣載筆侍行宮野曠氛初
淨沙寒雪未融樓蘭終就縛疏勒看銘功夜靜妖星落
春歸大漠空從茲億萬歲聖德詠無窮

二月一日早朝

曈曈初日曙光遙
鐘鼓聲傳下九霄
萬國衣冠趨象魏
兩階干戚奏簫韶
天清華蓋雲中見
風細爐煙仗外飄
朝出金門還北望
鍾山蒼翠正岧峣

秘閣書事簡諸同志

秘閣清嚴接觀臺
九重佳氣護蓬萊
宮牆樹近鶯聲度
金水芹香燕子來
行傍朱欄吟細雨
坐分瑤席絕浮埃
太平無事多休暇
忝列詞林愧不才

元夕侍宴

風清華月麗晴空
湛露筵開聖澤濃
燈火遙連丹闕外
簫韶只在綵雲中
九重瑞靄浮金雀
萬樹銀花璨玉虹
光祿傳宣催進酒
烏紗都映醉顏紅

閱子啟行卷

扈駕從容上北京
東風千里馬蹄輕
行宮日暖花爭發
御路塵消草正生
烏帽趨朝晨載筆
紅旗分隊晚催鉦
歷觀卷裏多佳製
端有才華壓長卿

題林郎中扈從行卷

六龍飛馭度行宮
煙火人家萬里同
仗外馬嘶春草綠
堤邊花映暖雲紅
考功今日推韓愈
愛客當年說孔融
扈從北來多俊傑
仙郎詞賦喜偏工

次韻答胡學士塞外見寄

塞草初過春未動
歸來應見綠紛紛
橐弓幾對龍沙月
退食須瞻鳳闕雲
喜有音書來遠道
好將勲業繼前聞
禁垣自昔稱頗牧
不獨胸蟠錦繡文

朝回喜雪即事

闕下朝回散錦韉
窗前獨坐擁吟氈
一爐松火春生席
萬點璚花雪滿天
臘蟻泛甌傾綠醕
香狸載俎割紅鮮
微才碌碌嗟無補
飽食徒令愧俸錢

元日朝回試筆

鐘鼓聲長欲曙天
雞人唱漏綵雲邊
彤庭簇仗森儀衛
玉殿開簾散御煙
春色九重瞻舜日
嵩呼萬國頌堯年
華夷錫宴覃恩澤
醉後宮花壓帽偏

元夕侍宴

寶山凝翠玉樓前
火樹銀花照御筵
羅綺香濃春色早
琉璃影碧夜光懸
翩翩鸞鶴來三島
燦燦星河下九天
一派笙歌綵雲裏
好風吹送萬方傳

和曾學士扈從獵陽山

曉隨萬乘出城東
列校分屯部曲同
雲裏六龍移綵仗
風前一雁落雕弓
露凝松栢垂垂白
日映旌旗獵獵紅
遙見下綏傳令發
將軍飛騎總英雄

瓊島春雲

萬歲山高玉作臺，卿雲垂綵畫圖開。
九重天上從龍起，太液池頭伴鶴回。
松靜晚煙同縹緲，花深晴影共徘徊。
何須更說蓬萊境，不是飛仙不肯來。

金臺夕照

斜日高臺散綵紅，遙天極目思無窮。
迢迢關塞微茫外，簇簇山河錦繡中。
鴻雁數聲催暝色，牛羊幾處散秋風。
黃金銷盡人何在，青史傳來事不空。

題朱源永桑洲卷

芳洲究在中央不種閒花只種桑
戴勝降時春雨足吳蠶熟處夜燈忙
幽風王業開千載河漢天孫漫七襄
願借縹絲三百丈虞廷先織舜衣裳

詠夢

林扉無客晝常關數卷殘書已倦看
芳草池塘春寂寂華胥風日路漫漫
枕邊未必迷蝴蝶耳畔都來鬪觸蠻
欲問希夷求秘訣華山高處不勝寒

村居即事

天上歸來葺敝廬
買松移竹事幽居
喜從鄰里團新社
得教兒孫讀舊書
芳草池塘清漲溢
落花門巷綠陰初
莫言疏傅金都盡
素手親知樂有餘

重遊道德觀留題

老我重來六十年
當時道者夏雲巔
眼中遺像還依舊
物外閒情尚憶前
但見銀牀梧葉下
空聞碧落黍珠懸
如今已動麻姑感
何待方平更惘然

頤菴卽事

老去無心到處安一菴容膝足盤桓且教隨地開蔬圃
還待分畦作藥欄耳聵久拋琴袋冷吟多不放酒杯乾
深嗟文墨曾何補終日瞻天愧素餐

紙帳

溪藤搗就淨無塵斗帳裁成雪色新枕上不知霜滿屋
窗前長愛月為隣梅花遠托江南夢木榻初回薊北春
莫笑先生心似鐵老來隨意樂清真

曾知州送葡萄酒

故人遠送葡萄酒
灑灑流霞照玉杯
百斛驪珠霜後壓
一雙渾脫雪中來
金盤盡瀉薔薇雪
銀甕還封瑪瑙醅
留待明年春色裏
陌頭攜賞看花開

送黃翰赴江西

臺中楚楚繡衣郎
千里乘驄入豫章
鵬鶚九霄搏健翮
豺狼幾處避飛霜
草青南浦春風早
月過東湖夜色涼
百鑑堂深清似水
一簾花氣散幽香

竹深處為蘇州劉孟公題

種得琅玕歲月深
吳山千畝碧沉沉
煙生曉翠日當戶
風落秋聲月滿林
却笑叅軍偏嗜酒
時邀中散共鳴琴
興來自是忘形迹
直造幽居看綠陰

生孫

汝父別時猶總角
忽聞生汝是今年
敢誇抱送從天上
且得尊堂慰目前
老去舊書欣有託
病來華髮任垂顛
謝家竝詫芝蘭秀
獨愛堦庭玉樹鮮

送鄭御史幹致事還浦江

七十懸車荷聖情，繡衣重耀日華明。
亦知報國丹心在，無那催人白髮生。
家世百年存孝義，天書五色動光榮。
歸來子姓森成列，一一堦前道舊名。

送鄭知縣堅復任樂安

製錦長懷撫字心，久傳佳政似山陰。
千家機杼人煙靜，百里桑麻雨露深。
門外賸栽陶令柳，堂中時鼓宓生琴。
茲時更好崇清望，會見雙鳬入上林。

北京官舍中秋夜與俞廷輔萬克修二進士對

月

玉宇無塵夜色涼
畫堂明月耿秋光
開樽喜對二三子
酌飲何辭千百觴
仙掌露零風肅肅
廣寒天近樹蒼蒼
人生到處堪乘興
誰謂南樓興獨長

送應子澤重赴臨江太守

清江碧嶂照空明
太守重來竹馬迎
道上兒童歌五袴
樓前鼓角列雙旌
錦囊又見攜琴去
畫舫還聞載月行

此日都門一杯酒臨歧不盡別君情

早秋

玄晏先生老卜居年年只共一床書烹葵及菽情如故
問舍求田計已疎幾樹碧梧秋信早半窗明月夜涼初
天河豈有支機石祇恐君平語亦虛

送何教授赴松江

三十年前舊所經題詩今日送君行一經皓首青氈老
五兩薰風彩鷁輕白鶴坡殘遺迹古紫薇花在講堂清

故人相見如相問竊祿深慚負世名

夜坐無簡貝司業

月落銀河淡不流雲搏星彩坐來收樹頭驚鵲三更雨
草裏鳴蛩一片秋張子謾吟青玉案蘇卿猶有黑貂裘
憐君獨守詩書在矻矻窮年未肯休

竹谿為劉孟雍題

何處幽閒號竹谿君家萬竹繞芳堤葛陂疑有蒼龍住
蔣徑曾無彩鳳棲雨氣凝簾浮翡翠風濤搖檻漾玻璃

好看故舊頻移棹細覓琅玕節下題

永樂八年春二月重被詔直內閣即事有詠遂

成

清曉朝回祕閣中坐看宮樹露華濃綠窗朱戶圖書滿
人在蓬萊第一峰

又

御溝風細水生波喜得春來暖漸多堦下絕無塵迹到
橋邊只有侍臣過

又

齋宮西畔御橋東
禁署清嚴祕閣崇
內使傳來門欲鎖
漏聲遙下五雲中

又

承乏詞林愧不才
重承恩詔直芸臺
筵前視草頻封簡
帶得天香兩袖回

又

朝來吹面柳風涼
宮瓦微微覺有霜
金鑰啟時紅日上

瑣窗瑤席迥生光

戲馬臺

盛世英雄酒一杯
悲歌祇使後人哀
平生廢盡屠龍技
今日空留戲馬臺

附蕭紳詩

字鵬舉泰和人
任蘇州府同知

宿道德壇東白水道人

明月不可得
孤燈還近人
祇緣懷久別
轉覺坐相親
露下松壇夜
雲歸石洞春
所歡心跡靜
笑語見情真

奉呈子高劉先生

剪燭臨清夜，開窗對白雲。
不眠詩共賦，罷酒初醺風。
起松聲近溪，迴野色分別。
來愁思滿南，雁正紛紛。

予自流江將歸南溪，劉先生亦還珠林，賦此別。

伯昂諸友

白紵明春雪，清樽注晚霞。
客行天共遠，人醉月初斜。
碧岫神仙宅，珠林處士家。
東歸三十里，好為寄梅花。

夜泊安慶

水國勢漂搖江城景閨寥朝天知路近望月憶家遙雨
散虹光靜煙清蜃氣消明朝風色好穩駕海門潮

曉經華陰

日出仙人掌天開岳主祠望來秦地遠景愛華山奇霜
後千年檜雲蒸五色芝嚴程不可住歸路訪希夷

閏十二月十五日立春作

霜雪猶殘歲乾坤又早春客居隣守舊官厯喜從新草
木萌應動昆蟲屈漸伸九天多雨露端望發生仁

宿平陸村

昔年曾此宿今日是重遊
兵後人煙少村中草樹稠
霧開螢照夜月霽雁鳴秋
明發前途去逢人問鎮州

奉東蕭子充

多年結屋向溪橋此日飛書肯見招
池上看鷺朝洗硯月中騎鳳夜吹簫
滿林西日迷花樹近水南風亂柳條
遣興題詩寄離思青山回首故岩堯

奉寄王伯衢

故園江上幾時歸
雞犬蕭蕭入翠微
幽徑晝間芳草合
曲欄春暖落花稀
露濃香浥黃金盞
風細涼生白紵衣
雙鶴寄巢松樹杪
新來應解引雛飛

寄吳所興

南溪流水北溪雲
無限新愁總憶君
鴻雁歸時天杳杳
鷓鴣啼處雨紛紛
郎官湖口江流合
武姥峰頭樹色分
相去祇緣三十里
此生何事苦離羣

人日訪友會亭馬上作

新平騎馬汴河堤草暖沙晴信馬蹄路轉桑林時見兔
鋪回茆店午聞雞尋芳漸喜春初及訪舊先愁日欲低
料得一彎今夜月多情偏照會亭西

聞雁

夜半忽聞征雁鳴傷心不覺淚縱橫關河迢遞家千里
風露淒涼夜五更遙想入雲雙翮健最憐和月數聲清
客中作得平安字肯為愁人寄遠情

挽迎仙觀熊得昌鍊師

把臂神仙竟不回山中弟子有餘哀
函關曉霧青牛去華表秋風白鶴來
九轉丹成遺井竈三春花落閔亭臺
時來弔古懷清隱愁絕芝田半草萊

寄林知縣彥澤

多時無便到東津料想風光日日新
柳畔鶯聲能醉客庭前花氣欲薰人
舊馴野鶴紅生頂新買河魚錦作鱗
解印歸來宜晚釣笑談傾倒有西隣

題臨溪齋

高齋光霽愛臨溪兩岼垂楊翠色齊石上鳴琴看鶴舞
溪邊洗醖聽鶯啼閒來自愛心如水興至無嫌醉似泥
為訪幽樓渺何許因風先與寄新題

余學夔

字一夔泰和人
仕至翰林侍講

蓼莪菴

涼風颯以淒浮雲蕩無涯
螻蛄俟秋急春華已無滋
感茲動中曲悠然興我思

我思亦何由悲淚應心流
念彼泉下親一往不可求
客

音邈難遇能不增煩憂

煩憂令人勞怨彼風木號棲棲無所託
蓼莪已成蒿至思諒難酌漠漠蒼天高

天高不可極歲月還蹉跎逝者益易疎
生者其奈何淚流漬胸臆忽忽將成河

賦得蓮花峰送陳叅政士啟歸山東

泰山入浮雲傍有蓮花峰神秀結坤輿
青天削芙蓉翠色干蒼旻奇氣蒸鴻濛
登躋豁壯懷萬里歸眼中三島

縹一髮蒿華青無窮我聞舜巡狩秩祀先岱宗何時相
遺跡激烈懷高風

玩易齋

冬至陽氣應仲夏陰始臨陰陽遞往復寒暑互相尋伏
義探元化易理何其深竒耦陳卦象人文宣至今象文
本周辭造詣何駸駸仲尼續韋編斯道寔所任藹藹伊
川言泠泠康節吟卓哉朱夫子衆理會其心後賢繼遺
緒鑽仰競光陰寄言來學者視此瑤華音

遠遊篇贈楊以任

少年惜然諾結交世上英金羈絡駿馬萬里重橫行衣
袍艷艷錦帶赤吳鉤炯炯雙龍鳴自擬掉鞭遊洛下還
思談笑過吳城揚帆歷海外倏忽如旅蓬南來幾度時
名滿江湖中風吹白浪如銀屋大舶中流八千斛青蛾
皓齒共徘徊急管繁絃互追逐偶然貰酒都城遊客來
解却千金裘移山轉海不作色傾情瀉意無所求魯連
子李謫仙澹蕩與汝皆同然浮名富貴兩安在千古惟

稱尚父賢

送羅秀才賁郡志詣北京還鄉

君不見廬陵節義高天下白璧黃琮等光價益公事業
照乾坤六一文章耀金馬後來作者楊與文孤忠激烈
萬人羣雲路才華多衮衮林泉隱逸何紛紛古往今來
幾千載夢寐長懷見風采冰壺玉鑑光若存大鏞金鐘
聲尚在國朝功業冠虞唐考圖稽古徧遐方中州圖志
不可後萬里奉冊趨明堂詞垣展玩生顏色却笑疎遺

三太息明珠魚目尚紛紛
侈進縱橫更遺佚
薊門秋雨鳴歸鴻
錦筵朝別城門東
赤縣霜清菊花白金臺酒操
玻瓈紅沙頭酒盡朔風起
無限鄉情逐流水
明朝客別向江南
碧樹寒雲千萬里

蘆雁

金氣凝寒關塞秋
平沙獵獵黃雲浮
雁行驚起望南至
陣陣摩天下平地
湖田八月菰米熟
戛戛長鳴食還宿
天濶曾無矰繳憂
稻梁滿眼復何求
上林帶書今已矣

郝公通問應莫比未若逍遙遠浦中黃蘆颭颭秋風裏
送呂僉事升考滿還福建

衣繡乘驄似舊時風霜行處有人知閩山按節丹心苦
鳳闕承恩白髮垂關樹浦雲仍獨往素琴孤鶴謾相隨
十年直道終無改老去人傳柳士師

送胡中書教授臨江

十載抽毫侍御筵傳經鄉郡理歸船天低玉筍浮雲外
水遠清江夕照邊賓館春醪從客醉鳳池詩句許人傳

養親正喜鄉園近何似臨岐更惘然

寄康彥明

旅泊蹉跎忽暮年結茆還在潞河邊容顏不遣都人識
消息多因使者傳賦罷曉揮池上筆酒酣宵汎月中船
明年知遂歸休志會出東門設祖筵

梁知府之交趾

闕下相逢正白頭城南送餞值清秋九重恩命新君出
萬里江山舊日遊吏識鐵冠前御史民瞻皂蓋古諸侯

南交部裏興文教豈減文翁在蜀州

習編修父棄教職就封還鄉

菖蒲葉綠雨新晴
瞻首翩翩出禁城
內翰已頒新賜勅
廣文寧厭舊時名
送行獨愴賢郎意
歸去難勝故國情
聖世清江停棹處
晚年重與白鷗盟

玉泉流虹

石泉飛下碧嵯峨
濺玉跳珠濕薜蘿
影落半空懸素練
光垂一帶瀉銀河
朝宗遠匯滄溟水
分注時添太液波

幾度上林花落處偏因流向御溝多


瓊島春雲

祥雲天上擁瑤岑縹緲綢緼接上林光絢九重頻捧日
陰連萬井欲為霖三春暖濕花枝重九陌晴涵樹色深
何必蓬瀛滄海去從龍長想此登臨

贈方知府赴紹興

會稽為郡古來稱萬壑千巖遶郡城五馬試從今日去
一錢終羨昔賢名長河曙月孤帆影高樹流鶯兩岫聲

別後定知官况好黃堂應似栢臺清



石倉歷代詩選卷三百四十九

欽定四庫全書

集部

石倉歷代詩選卷三百

五十三

詳校官庶吉士_臣龍廷槐

侍讀_臣孫球覆勘

總校官進士_臣朱鈐

校對官中書_臣田尹衡

謄錄監生_臣洪燮

欽定四庫全書

石倉歷代詩選卷三百五十

明 曹學佺 編

明詩初集七十

曾 啓

字子啓
永豐人

北斗篇

昔我住江南有斗維北懸及茲正幽薊如在北斗邊地
理雖異域象緯寧有遷感此夜無寤起行望青天仰視

北斗光珠璣燦相聯伊誰柄斯揭從容居帝前元氣妙
斟酌調和不容偏四時皆順序萬物安自然躊躇風露
下中情曷由宣天道本幽默誰能問穹玄

涼風篇

涼風日夕至商候淒以清逶迤起原陸散漫薄簷楹噫
氣忽奮激呼吸相關爭捲地瀉奔濤撼空轟怒霆如馳
昆陽騎若潰淮淝兵雲霧為之晦山岳若就傾豈伊長
養節遂與肅殺并草木自黃落鴻雁復南征顧茲動植

微感觸如有情起坐待明月援琴寫秋聲

癸巳三月十三日扈從之北京舟發石城門外

賦呈同行諸公

石城天設險虎踞壯皇州策馬出都城駕言從豫遊萬
乘宿嚴駕先期戒行舟龍驤載圖籍虎士羅戈矛日出
簫鼓鳴中流發棹謳兩京何巍巍山川鬱相繆陝雲邁
炎漢洛下婉成周龍飛符景運龜食叶神謀煌煌萬世
業寶厯承天休顧慚樗散姿厠跡英俊流獻替諒無補

愧茲恩寵優鳴鑾濟汾水聯珮上瀛洲永言葵藿心庶
以揚徽猷

三月二十日舟次開河同胡祭酒鄒侍講登岸
散步長林曠野中桑麻翦然因至田家各賦
一詩而去

芳晨靄新霽弭楫長河曲睠茲丘園趣褰裳涉平陸郊
原渺空曠佇望舒遠目村中夜來雨土脉膏且沃蒔廬
雞犬靜日出煙樹綠牛羊放平野隔水見樵牧麥涼雉

初雖桑突蠶已浴老農多歡顏生事亦云足偶茲一留
憩幽境愜所欲僕夫戒前征迤邐出林麓緬懷塵外踪
於焉恣遊矚

冬日扈從還南京隨駕出麗正門馬上作

朝隨六龍駕逴別黃金臺萬乘出都門旭日淨浮埃翠
華正飛揚玉輦從天回羽林列猛士夾道馳雲雷回首
望玉京城闕何壯哉海水向東流西山鬱崔嵬上有五
色雲垂輝映蓬萊壯遊愜周覽欲去仍遲回策馬天仗

間宿昔長追陪古來詞翰臣豈但鄒與枚至今百世下
聲譽揚九垓

車駕北征送右諭德金公扈從

煙雲慘淡邊城黑鐵騎憑陵在東北天兵帶甲八十萬
百里長驅如霹靂平邊下詔親出征二月龍輿發北京
東風關塞旌旗影落日沙場輦鼓聲知君文彩金門宴
扈從恩榮總堪羨龍泉寶帶黑貂裘虎帳雕弓白羽箭
帳前獻俘報捷歸帳中草檄筆若飛狼煙乍起雪載路

羌笛橫吹霜滿衣
彗星夜墜氣蕭索
席捲穹廬空大漠
橫行絕域拓封疆
直過窮荒收部落
歸來意氣擅才雄
凱歌先進明光宮
豈知折衝在帷幄
世上空聞衛霍功
送兄復先還戍遼東

從兄少小辭鄉縣
二十五年纔一見
只今已是四十餘
平生涉歷艱難遍
憶初伯父送兄行
千里拏舟同入京
長安道上不忍別
臨岐忍泣仍吞聲
別來幾時伯父死
舊業盡遺與二姊
大姊有家二姊亡
一門骨肉今能幾

兄早從軍多苦辛漂泊天涯惟此身拜迎折腰事官長
顧盼回頭無室人去時同行多隊伍逃亡強半丁男補
十歲邊頭始問婚有子讀書今十五營中無事但耕鋤
輸官豈復求贏餘地寬買牛多種粟路遠念家難寄書
弟來北京已二載東去關山近遼海都門邂逅不相識
鄉音盡變顏容改塞上風沙凋敝裘說著故園雙淚流
挑燈細論征戍苦酌酒暫消離別愁匆匆相見何曾久
明日官橋又分手朔雪還連玉塞雲東風未發金臺柳

莫言碌碌軍籍中丈夫詎肯悲途窮不見汾陽起微賤
唐史猶傳第一功

天廐神馬歌

天廐名馬不易得鳳臆龍鬚秋兔色圉官廝養十載餘
云昔來自朝鮮國想當此馬初生時蛟龍降精雷雨垂
房星夜墜水盡赤雲霧下繞靈風吹雄姿逸態真神駿
腕健蹄高雙耳峻目光夾鏡炯方瞳汗血流珠膩紅暈
朝鮮得此不敢騎覆以黃氊獻赤墀迺知天廐盡龍種

如此萬疋皆權奇
今晨鞴出迥殊絕
扈從鑾輿自超越
朝趨遠蹀交河水
夕秣驕嘶薊城月
君不見驂騑驕驕
古亦多老不一試
將奈何駑駘無力
枉蹀躞俗馬有肉
空嵯峨平生憐爾
獨遭遇繡勒金鞍
照瓊署相期慎保
不凡姿萬里長隨
六龍馭

寒夜曲

銅山泣露宮虬咽
魚鑰金寒炯微月
十二樓臺凝夜光
青娥踏天作飛雪
鮫人鑿冰出海底
海濶冰堅愁墜指

風刀剪斷朔雲飛萬戶沈沈一泓水貂裘無煖紅燭滅
八尺青綾已如鐵蘭麝香銷冷畫屏夢破秦樓肌玉裂
龍鱗差差溝水繞銀牀無聲金井悄睥睨鴉啼曙色分
起聽瓊籤報天曉

銅爵瓦硯歌

臨江郡守得銅爵瓦硯以遺中舍吳君仲平吳君邀予賦之

征西將軍蓋世雄睥睨漢鼎驕成功建安天子在掌握
車駕又徙輶轅東策勲定爵分茆土赤烏煌煌輝袞黼
鑄成銅爵起高臺繡戶珠房貯歌舞繁絃急管鳴未終

葛汁啖盡金樽空分香賣履恩愛畢西陵落日生悲風
三方鼎峙霸圖熄玉輦金輿已陳迹冷雨寒煙滿鄴中
惟見銅駝卧荆棘誰憐地老天亦荒宮瓦散落猶深藏
千年劫火煉不化至今出土生輝光草根纏繞苔蘚蝕
鄴中野人初未識臨江太守欣得之此物不應同瓦礫
殷勤拂拭重磨礪制作豈讓端州工鳳池先生真好古
寶此乃與瓊瑰同先生自昔稱才俊忽見珍奇豁方寸
龍香麝臍益光妍玉質金輝發清潤翻思淪埋塵土鄉

此日還登君子堂奇姿曾識奸雄面清翫宜親翰墨場
君不見漢家諸陵在荒野玉魚金盃無遺者早悟愚民
盜一坏不如燒作鴛鴦瓦

陳員外奉使西域周寺副席中道別長句

漢家郎官頭未白扈從初為兩京客忽逢天邊五色書
萬里翩翩向西域腰間寶劍七星文連旌大旆何繽紛
解鞍夜卧營中月攬轡朝看隴上雲黃沙斷磧千迴轉
玉關漸近長安遠輪臺霜重角聲寒蒲海風高弓力軟

茲行騎從歷諸蕃
羶帳依微絕漠間
殘煙古樹羌夷聚
遠火荒原獵騎還
蕃酋出迎通漢語
穹廬蒲萄酒如乳
舞女爭呈于闐粧
歌辭盡協龜茲譜
當筵半醉看吳鉤
上馬便着金貂裘
山川遙認月支窟
部落能知博望侯
草上風沙亂騷屑
邊頭日暮悲笳咽
行窮天盡始回轅
坐對雪深還仗節
歸來雜遝宛馬羣
立談可以收奇勲
却笑古來征戰苦
邊人空說李將軍

薊門老婦行

薊門老婦歌且行一曲斷腸多苦聲時時掩面向人泣
泣罷從前道姓名自言少小顏如玉金縷羅襦關粧束
先朝丞相重清歌教得新翻太平曲雕房繡闥高嵯峨
五侯七貴時經過就中艷色自無數俛首低鬟聽我歌
行雲斷絕梁塵起滿座停杯驚且喜當筵一擲千黃金
翻惡管絃徒聒耳只言歡樂度青春不識人間賤與貧
向來風景一朝異翠鈿散落隨埃塵況今衰老轉蕭索
惟有茆廬傍西郭閒來還唱舊時歌不覺一聲雙淚落

人生豈得長少年一貧一賤皆自然銅山鑄錢終餓死
古往今來何足憐

姚少師所藏八駿圖歌

周家八駿如飛電夙昔傳聞今所見銳耳雙分秋竹批
拳毛一片桃花旋肉駿疊聳高崔嵬權奇如此真龍媒
霜蹄試踏層冰裂駿馬欲掉長颿迴瑤池宴罷歸來早
絡月羈金照京鎬紫鞵飛時逐落花雕鞍解處眠芳草
由來駿骨健且馴弄影驕嘶不動塵有時渴飲天津水

五花照見波粼粼
圉官騎來難久駐
飲向春流最深處
珠銜寶勒不敢疎
直恐飛騰化龍去
古來善畫韋與韓
此畫豈同凡馬看
人間造次不可得
苜蓿秋深煙雨寒

酒壚行

東家酒壚大道中
百尺酒旗垂裊風
少年兩姬何窈窕
當壚一笑顏花紅
道傍過者頻回首
駐馬停車便呼酒
壚頭酒薄渾不知
笑勸相歡坐來久
西家酒壚相向開
盈盤綺饌連金罍
門前寂莫少行跡
階面夜雨生青苔

由來酒徒多重色愛此紅顏在壚側暫時過眼寧盡歡
囊中有錢應不惜誰將此意報西隣坐中無客且莫嗔
東隣兩姬一朝去門前亦無呼酒人

邯鄲曲

邯鄲女兒貌如花手綰雙鬟盤作鴉窄襟小袖巧粧束
畫得秀娥雙黛綠娉娉嫋嫋十五餘自矜驕態誰得如
春眠不穩翠衾薄起向東風惜花落誰家寶帶繡鴛鴦
何處金屏開孔雀邯鄲城中多貴游投金寘壁紛相求

父憐母惜嫁時早比日連枝願終好芙蓉帳深紅錦幔
烹犢炮羊列華饌生來不識機杼聲身上羅襦幾回換
翻憐隣女嫁田家朝出採桑暮織麻年年辛苦事織作
嫁時衣裳老還着

題楊諭德所藏王孟瑞瀟湘萬竹圖

王郎畫竹何神奇落筆便覺清風吹蛟龍怒奔雷雨泣
滄溟倒捲雲淋漓有時氣酣索紙筆兔起鵬落誰能測
縱橫滿眼金錯刀四座陰森冰雪色九疑峰高青入天

洞庭水與三江連霓旌翠羽半明滅至今遙拂蒼梧煙
玉堂之居迥蕭爽誰與此君同一賞關西美人襟抱清
對此脩然絕塵想我亦平生愛竹流乘興欲作瀟湘遊
何時汎舟弄明月推蓬却聽江南秋

樓山風木圖為山西僉憲余文題

樓山有木風亂鳴南枝北枝多悲聲蕭颼乍疑崖籟發
洶湧忽訝波濤驚知君先墳在山麓忍聽墳頭風撼木
秋聲動地心欲摧夕響穿林淚盈掬翻思昔日奉慈親

甘旨未備家長貧只今得祿親已逝雖欲養志無由伸
繡衣驄馬外臺容光華滿路何輝赫寫得樓山風木圖
一度摩挲一淒惻看圖有盡意不窮樓山有木木有風
斯木可伐風可息惟有孝念無時終

車遥遥

車遥遥向何去耳邊猶聞聲轢轢望盡飛塵不知處妾
獨在空閨顰蛾對青春惟有一寸心萬里隨車輪願君
到家後車輪生四角不願歸時金滿堂君早歸家貧亦

樂

過劉伶宅

舊宅無人住荒墟有路岐
一生渾是醉萬古復何悲
白髮銜杯處青山荷插時
最憐獨醒者高塚亦累累

望岳

昔誦少陵詩今觀岱岳奇
青連齊魯迥勢壓華嵩危
雲霧通三島乾坤繞四陲
何時上高頂細讀漢唐碑

庚寅元夕午門侍宴觀燈

紫禁疏魚鑰彤庭結綺樓星河臨太液歌吹繞皇州皓
月明仙仗華燈映綵旒清時多樂事長得奉宸遊

二十一日發汶上馬驚失墜損傷有旨留濟寧
療病水路回京寓宿城東鐵塔寺消悶賦此
錄謝王蔣二太守明會上人

因病辭天仗行尋寶殿開六龍扶輦去五馬駕車來落
井多因酒沿流欲度杯承恩方療疾候吏為相催

其二

寂歷孤城外高樓戍鼓鳴葉聲霜後落鵲影鏡中行一
榻禪房靜孤燈客思清疎鐘一百八猶似上陽聲

淮南舟中

遠戍雞聲曉遙堤柳色濃斷雲京口樹殘月廣陵鐘簫
鼓官船發圖書御寶封朝臣多扈從冠佩日相逢

舟中雜興和王修撰時彥韻

野迥霏微靄川長澹落暉犢浮水過鷗狎近人飛暝
色迎官舫春寒到客衣時看林下叟荷篠月中歸

贈周崇晉省兄還家

新歲歸心切南船促去程誰憐風雨夜偏感弟兄情淑
景催鶯語離愁逐雁聲到家池草綠春夢幾回驚

維揚懷古和胡祭酒韻

廣陵城裏昔繁華煬帝行宮接紫霞玉樹歌殘猶有調
錦帆歸去已無家樓臺處處惟荒草風雨年年自落花
古往今來多少恨只將哀怨付啼鴉

中秋宴集

乘月歸來散玉珂又驚佳節客中過清光初上金鑾殿
素影先澄太液波波萬里關河秋氣迥九秋風露夜涼多
廣寒有路知天近曾聽霓裳第一歌

同襄城伯李公被命先還南京舟中奉簡

曾于玉帳識先公此日乘舟李郭同兩葉金貂承雨露
三秋畫鷁駕天風謝玄瞻氣堪摧敵班勇軍聲屢破戎
自是將門多俊傑坐談韜畧滿胸中

喜蕭時中狀元及第

繡衮曾掄寶殿魁廬陵文運喜初回九重天上承恩渥
八十人中識俊才蠹簡幾年窺夜雪龍門一日動春雷
行人若向青原望定有虹光燭上台

送道士歸桃源

霞佩何年別翠岑迢迢歸路武陵深種來白石皆成玉
煉就丹砂已化金陰洞靈符應尚在仙房瑞簡得重尋
桃花紅徧無人到風滿衣裳露滿簪

遊崇真萬壽宮因訪葛太常

崇真宮闕禁城東舊住真人向此中鳳去緱山虛夜月
鶴歸華表怨秋風飛花入戶丹房靜古木垂蘿碧殿空
此處忽逢勾漏令將因暇日間叅同

螢

輝輝無焰復無煙腐草逢秋火獨然金井露寒光不滅
畫簾風靜影頻穿隋皇苑裏明珠翠車盾囊中映簡編
何事却驚羅扇撲夜涼飛過玉階前

殿試罷

曉開三殿降絲綸
袞冕臨軒策小臣
紅燭影催金闕曙
紫霞香泛玉壺春
雲霄九萬扶搖近
禮樂三千制作新
淺薄未能宣聖德
祇歌棫樸播皇仁

鶴骨笛

華表雲歸蛻獨留
裁成玉管韻悠悠
數聲弄罷青田曉
一曲吹殘赤壁秋
律呂乍調驚羽化
宮商遙度想仙遊
揚州去後知音少
且共桓伊更倚樓

謁文丞相廟

國事艱危屬秉鈞平生慷慨竟捐身百年社稷歸元土
萬古祠堂表宋臣已見高名垂宇宙遠瞻遺像肅冠紳
當時碧血生芳草留得清芬歲歲春

蓮花燈次胡庶子韻

絳蠟爭燒夜景新芙蓉何事獨先春恍疑金炬初歸院
不借清連已絕塵光映若耶溪上女影隨太華井頭人
若教真可浮波去太乙乘舟便脫巾

車駕渡江

朱旗畫戟擁隄沙錦纜牙樯照浪花佳氣迥浮江北樹
曉光初絢海東霞雲中鸞鳳扶雕輦水底魚龍識翠華
不用臨流羨天塹祇今四海盡為家

扈從幸天壽山

祥雲五彩護長陵地志深符郭璞經千澗盡通滄海白
諸峰遙入薊門青星臨仙仗知天近雲擁鸞輿識地靈
此處經營時駐輦幾回清蹕到岩扃

得周編修書兼柬兩京諸同年

別離易久覺情疎旅舍幽閒歎索居遠客每勞千里夢
故人初寄一行書滿城山色晴雲外近海潮聲過雨餘
禁裏昔年同學者班揚文字竟何如

同李允周司諫遊天界寺和鄒侍講韻

獨愛山居在上方深幽渾似遠公房客留丈室同揮麈
僧飯胡麻獨據牀貝葉經翻頻說偈蓮花漏滴靜焚香
何時更約携琴去閒對青松坐晚涼

冬日扈從獵龍山同遊牛首山佛窟寺和胡學

士韻

數聲清磬遠微微始覺塵踪到此稀
僧向定時聞葉落客從遊處見雲歸
佛居華藏知營窟心會真乘即悟機
賜得宮袍新製錦未應還羨五銖衣

奉和胡祭酒雪竹之作

雪深庭竹曙光寒覆葉凝梢凍不乾
清響入林搖玉珮素花飄徑點琅玕
未須鶴氅扶筇去已勝龍沙仗節看
莫向樽前栽玉笛梅花吹落滿長安

燭

曾于鴻寶識神方長送清輝入洞房
心到成灰辭綺席花如吐艷妬紅粧
盡屏掩月兼秋冷紫陌朝天襍曙光
幾度似應憐遠別向人深夜淚成行

胡祭酒宅飲蒲萄酒席上作

蒲萄新釀出涼州對此還思博望侯
馬乳香分銀甕暖驪珠光瀉玉壺秋
綺筵夜醉頻燒燭錦帳春生罷擁裘
翻笑老農耕作苦年年種秫滿西疇

瓊島春雲

自是蓬萊第一峯，彩雲千疊映芙蓉。
隔窗暝鎖花枝濕，繞殿晴添柳色濃。
影度仙巖常帶雨，光浮御苑盡成龍。
綢繆不獨隨天仗，更共祥煙護九重。

西山雪霽

宮甍遠岫倚蒼冥，積素纔消擁畫屏。
雲影高連千嶂白，日華光映數峯青。
林藏玉氣樵人識，水雜流泉野客聽。
正欲登臨窮絕巘，餘寒猶恐在巖扃。

南浦飛雲

悠悠片影楚江涯
漠漠輕陰傍釣家
乍逐渚煙籠草色
還隨灘月隱蘆花
風吹暝靄收殘雨
日絢晴暉帶落霞
幾度雁歸迷宿處
數聲鶯啞隔寒沙

徐亭煙樹

東湖老樹拂晴雲
樹裏空亭識聘君
鶯轉綠陰初過雨
鴉啼涼影半斜曛
誰懸木榻延高士
空致生芻弔古墳
千載高風遺像在
令人俛仰挹清芬

灌嬰城

章江南面有荒城千載猶傳漢將名
孤宿斷垣春草合鴉啼古堞暮煙生
風雲暗想精靈聚茆土長垂竹帛榮
獨有離離霜後樹還如赤幟繞行營

繩金塔

地藏舍利隱金繩百尺浮屠試一憑
雲裏高標驚過客月中孤影伴殘僧
風傳鈴鐸和朝梵星繞闌干雜夜燈
向夕始知臨眺久蒼蒼煙樹入鍾陵

浴仙池

不向瑤池醉錦筵却從下界戲清漣
冰壺影浸芙蓉露玉鏡香涵翡翠煙
白鶴已隨仙骨化青娥長得世人憐
春來水面浮萍發猶似靈風墜翠鈿

五月六日賜觀西湖

玉珂龍影出長楸詔許西湖攬轡遊
雲氣連山常帶雨風聲度壑迥疑秋
樹含飛翠沾衣濕泉作垂虹遶澗流
中使淹留歸向晚水紋輕漾采蓮舟

送胡直方下第南歸

百戰詞場白髮生
詞華五色世空驚
貧來馮諼空彈鋏
歸去劉蕡久擅名
柳外煙深籠馬色
花邊日暖度鶯聲
青雲浩蕩非難遇
天遣奇才獨晚成

正旦後送兵部尚書趙公還鎮

總戎司馬舊春官
坐鎮邊陲衆自安
雙闕朝元瞻斧扆
六州行部駐雕鞍
履聲暫待金門漏
旆影還衝玉塞寒
明到關城多暇日
好將佳句寄朝端

送兵部尚書陳公叔遠鎮交趾

南交獻凱正論功
司馬新除寵眷隆
三受虎符參閫外
兩持龍節鎮蠻中
蕭何經國會供餉
裴度臨邊暫總戎
已喜夷人歸版籍
伏波銅柱謾爭雄

東華門內新館初成入直有作

東華樓觀鬱宮堯
高閣新成抗碧霄
秘府圖書金作匱
御溝流水玉為橋
草分翠色承殷輅
鳥哢歌聲和舜韶
愧直幾回清坐久
隔簾時有御香飄

禁中對雪

禁城飛雪向嚴冬，積素凝華絢九重。
內苑龍蔥瑀作樹，西山嶠嶂玉為峰。
光連紫陌迷朝騎，色晃彤樓促曉鐘。
欲向豐年歌此曲，郢中詞客可能容。

送陳司封使哈里

旌旆翩翩拂曉霞，遠傳天語度流沙。
據鞍馬援心猶壯，投筆班超髮未華。
路出玉關朝仗節，水通銀漢夜乘槎。
西行正值蒲萄熟，醉卧涼州第幾家。

送羅貴赴南陽推官

早辭丹陛出承明
捧檄爭傳佐郡榮
高柳青煙隋苑路
荒村白水漢鄉名
心持三尺無冤獄
德被羣黎有頌聲
郭外行春頻借問
卧龍遺業與誰耕

項羽廟

百戰休論蓋世功
鴻門終宴伯圖空
虞歌慷慨孤燈下
楚業銷沈一炬中
露濕古塙秋蘚碧
霜含老樹夕陽紅
英魂若到彭城路
忍聽高臺唱大風

秋日扈從獵龍山遊牛山佛窟寺和胡學士韻
古鼎沈煙一縷微紺園寶地世塵稀風簷鳥避鈴聲過
石洞龍隨雨氣歸閒對佛燈知幻影偶聞僧語識禪機
祇因坐久天香度無數雲花亂點衣

海子橋

綠海遙通一水長滄波深處石為梁平鋪碧甃連馳道
倒瀉銀河入苑牆晴綠乍添垂柳色春流時泛落花香
微茫迥隔蓬萊島不放飛塵入建章

春思

鶯啼燕語畫樓東麗日輕雲護綺櫳香篆暖飄煙縷碧
花房晴滴露珠紅纏綿客思王孫草搖蕩春光少女風
暗想多情催落絮時時飛入翠簾中

己亥除夜作

年年客裏逢除夕此夕金臺歲又除爆竹屢喧清坐久
梅花初獻半酣餘春回薊北看新厯家在江南憶遠書
奏賦未能叨扈蹕獨憐多病似相如

居庸疊翠

重關深鎖白雲收
天際諸峰黛色流
北枕龍沙通絕漠
南臨鳳闕壯神州
煙生睥睨千巖曉
露濕芙蓉萬壑秋
王氣自應成五色
龍雲長傍日邊浮

章江曉渡

月落西山欲曙天
渡頭人語古城邊
鐘聲杳靄臨江戍
帆影參差隔浦船
幾處蘼蕪深夕露
萬家楊柳暝晴煙
年年過客頻來往
誰向東流歎逝川

投書渚

爭傳皂蓋赴洪州錦字泥緘託去舟
懶與世人通契濶任隨流水自沈浮
萬金杳杳淪波底一棹翩翩出石頭
却笑空函猶自達當時誰作置書郵

澹臺墓

聞道南遊竟不回城門題字有澹臺
楚鄉耆舊留遺跡魯國衣冠識俊才
廟貌千年存俎豆旅墳三尺翳蒿萊
斬蛟毀壁真奇事青簡流傳莫謾猜

葛仙壇

片石空餘斷蘚青何年飛佩入蒼冥巖前花發春長在
澗底泉流洞不扃寶鼎紅光藏秘藥玉林龍氣護仙經
懸知此地修真者時掃寒雲夜禮星

美安州知州劉孟雍偕掌龍谿

拜命曾聞領一州邑民今喜寇恂留楓宸候曉雙鳧去
花縣行春五馬遊山郭煙嵐長滿市海天風雨迫疑秋
懸知勸課耕桑日處處兒童識故侯

揚州東關和王修撰時彥韻

翠裊紅袖坐調笙一曲嬌歌萬里情二十四橋春水綠
蘭橈隨處傍花行

憶別

一家去住兩關情行李蕭然又出京記得別時寒食後
斷煙殘雨石頭城

酒家

酒幔臨津口壚頭勸客頻雲鬟當暮整別有泊舟人

湖上

儂家湖水上水綠照蛾眉自惜容華好年年怨別離

石倉歷代詩選卷三百五十

欽定四庫全書

石倉歷代詩選卷三百五十一

明 曹學佺 編

明詩初集七十一

李時勉

名懋以字
行安福人

乘化室為晏僉事彥文賦

蟄蟲坯戶隙寒雀入海底丹砂煉無方安得長不死
蔭藟陌上花飄忽隨流水浮雲知所歸飛蓬逐風起吾生

金剛經卷第三
卷三百五十一
亦何為乘化如脫屣愧彼孟嘗君空悲灌門子

耕樂

守拙不用世獨分山中居原田繞林麓自能把鋤犂春
耕秋始獲食力寧厭劬種桑南陌上放犢東方隅蠶絲
如有望橐粟亦有儲上以輸官稅下以給妻孥俯仰皆
無匱取適不願餘雞豚滿眼前酒熟焉用沽興至時一
酌隣舍更相呼酡來忘日夕擊壤歌唐虞

送王御史貴莊

高堂何崔嵬，翠柏相蔽虧。柯葉鬱亭亭，凌寒發華姿。于
時送君去，臺樹生光輝。清風吹別袂，旭日明繡衣。晴雲
逐高蓋，遠見羣鳥飛。玉驄帶秋色，白簡肅霜威。謬古言
路不負夙所期，文才更誰似。冰蘖諒自持，行矣保終譽。
以慰長相思。

元夕後一日，士暘開宴，王侍讀宅得續字，時親
朋畢會，密雪驟至，意洽情真，不覺至醉浩然。
成詠

至茲暖律回况爾值元夕良辰得休暇勝賞隨所適故
人有高致開宴藉幽僻縈迴西城隅弘敞王猷宅雖微
山谷遊而絕塵俗跡列坐盡英賢諧笑有狂客密雪忽
飄灑中庭皓盈積醉來不知寒清光滿瑤席

金華陳氏宗遠嘉會堂

勝地敞華構前峙金華岑經始諒由昔踵武還自今楚
楚堂中人逍遙遂閒心良辰啓芳燕歡會情何深酌以
金缶卮奏以綠綺琴載歌伐木詩雍雍有遺音芝蘭數

餘馥桃李敷繁陰永言繼前烈因之播清吟

志喜詩為南康守林士敏賦

四海際開運聖明日清穆台鼎列碩彥外治資明牧自
非龔黃儔空懷蒼生毒伊人抱奇才一麾守南服撫字
忘勤勞德禮反淳樸雨露曉已濡怨恣去何速持誠銷
金石修文弭災酷果然愜所祈亦以諧素欲翔鸞集官
署蝗銷秀嘉穀豈伊感化工信乃徵明淑清芬播以邇
循良邈方續愧茲樗散材敢諷絃歌曲

江南曲送王太守

江水清見底江風吹浦蓮吳兒蕩輕槳采菱長江邊迴
舟指皂蓋望望遙相連龜齡歷千歲鶴髮垂兩肩今人
重五馬古人重一錢悠悠江南路沿洄波上船白日苦
易短莫言行路遠

送呂僉事升堂

朔風吹喬林落葉聲蕭條冥鴻飛不度驄馬行獨驕綠
衣帶恩光赤日麗層霄鳴佩別雙闕驅車上河橋嚴冬

氣已厲送君寒逾饒戀別薊城酒聊以永今朝

扶風竇滔妻蘇氏陳留令武公蘇道賢第三女也年十六嬪于竇氏滔時為苻秦秦州刺史有能名為堅所器重後以事忤堅謫戍河西之燉煌及堅取晉襄陽擇所守者莫踰于滔復起滔拜安南將軍鎮襄陽始滔有寵姬趙陽臺善歌舞滔甚愛之私于他所蘇氏偵知之求而加捶楚焉滔頗恨之而陽臺又媒孽

蘇氏短而讒之滔由是情好日疎暨滔赴襄陽邀蘇氏與俱恨忿不從滔遂携陽臺以往絕蘇氏不復與通音問者久之蘇氏煢煢無所適且悔恨不得以伸其思遂織錦為迴文累數百言遣家僮編出鬻之期至滔所欲以感動其意滔覽之不釋手者數日乃得探其憂鬱之情而悲傷焉遂逐陽臺之關中具車從迎蘇氏至漢陽恩愛益篤于初好事者或

繪為圖以傳于今吾友黃君卓以示余余感
夫世之人或讒邪以害正被謗以自屈者曾
不如蘇氏之善相滔之能悟而由其正也特
為賦詩七首以達其云蘇氏名蕙字若蘭連
波右將軍于真之孫朗之子也詩凡七首相
續以成文云

深閨有思婦慘悽亦何為容華不自惜獨理流黃機言
將成匹帛多裁遊子衣衣新忽變故恩愛從此哀以茲

殷勤意翻作長恨辭

蘭茝被幽畹桃李媚春陽
新昏結綢繆鞶衿散芬芳
棄置父母歡婉婉君子傍
白日麗朝彩朗月澄夜光
矢心以相顧願為鴛與鴦

西墅起高臺迢遞憑雲岑
中有嬌艷女當窗弄清音
容蕩以肆居然變同心
魚目奪明月讒口鑠黃金
不見冀中饁惻愴庾序吟

高車擁旌旆輝映漢江曲
富貴一朝異窈窕辭別屋
言

笑落日遲浩歌湘水綠山川不可踰安得遙相逐佳麗
誠足珍涼薄難見錄

滔滔江漢流到海不復返千里得所歸中復厭婉婉在
昔枉綏授駕言不辭遠誰知三周御却道羊腸坂芬芳
空自持白日忽以晚

昧旦不能寐攬衣起傍徨織縑與織素誰復知短長咫
尺組幽思迴還遂成章緘之戒僮御欲以寄遠方宛轉
述苦志敢期昔所伉

別久意恒親覽辭念愈結巾車適千里倏忽已超越鳴
琴諧古調恩愛感離濶夙心諒所負慙歎對明月睽言
固終始皓首以相悅

輓倪郎中維哲

故人忽遺榮往跡不可求暑雨灑高柳颯然涼如秋飛
鳥為我悲停雲為我愁行道亦悽惻情誼况綢繆感愴
念疇昔淚下馬能收

畫馬篇

望昔曾騎天廐馬，白日從龍自天下。
騰空繭影度陰山，回響方看汗流赭。
幾回逐虜沙磧中，振鬣長鳴駐翔風。
倏來忽往若驚電，衝羣一出萬馬空。
歸來共喜脫羈勒，放牧荒郊誰復惜。
還想當年出塞時，朝薄扶桑暮西極。
誰言潦倒筋骨衰，餘力猶堪一戰施。
豈比駑駘空飽粟，伏櫪長閑無所為。

邯鄲煙樹送朱珏叅議歸河南

邯鄲古城人到稀，碧樹蒼煙入翠微。
煙深草綠無行處，

樹底遊人歸去遲東風吹雲忽飛雨千樹萬樹花爭吐
紫霄雲斷落山青一望嵩高在何許前年騎馬過城西
記遑舊路今不迷春深柳市看人醉日出桑林聞鳥啼
邯鄲人家多賣酒且上高樓呼一斗豪來不用謫仙人
半酣落筆詩千首遙指邯鄲送客行潞陽西望洛陽城
紫薇花底一回首雲樹相思無限情

岩岩亭送陳叅政歸山東

岱宗磅礴不可擬翠色橫秋幾千里峭石巉岩倚天外

孤亭屹立當山趾
亭前芳草沒路歧
古砌荒涼苔蘚滋
幽花拂檻無人採
獨鳥時鳴聽者稀
晨露浴日千峰紫
一杯遙見滄溟水
昇元觀裏曉鐘聞
岱嶽祠前白雲起
聖賢大道誰不由
乾坤闔闢同周流
泰山氣象偶為喻
誰遣名亭獨此留
君去薇垣有閒日
隨處登臨訪遺跡
想得凭欄一望餘
懷古清吟興何極

仲昭竹為韓侍御題

渭川一千畝
此地兩三竿
盛夏那知暑
隆冬亦傲寒
清

陰連野外翠色上雲端不是全高節如何耐久看

東郭草亭宴集

名園初過雨春氣曉來和一徑濃花發滿庭芳草多尊
罍留上客絲竹間清歌還說歡娛少相期更一過

李處士輓詩

不見柴桑客黃花空自香江通張翰宅人識鄭公鄉三
徑餘芳草孤墳慘白楊秋風谷平里寒月夜淒涼

送積中上人歸天竺

承恩辭北闕飛錫返東林柳帶天邊雨松迴巖際陰談
空青嶂曉戒臘白雲深坐對湖中月能忘去住心

天水一清樓

湖邊樓閣鬱崢嶸水色微茫泛太清灝氣淨隨春浪遠
雕欄低拂暮雲平曉看赤日波心上夜覺銀河地底行
登覽誰知王勃美雄才高論使人驚

東郭草亭

曉出東城問路蹊綠陰深處紫騮嘶日烘花氣和蘭勺

金少卿先生集 卷三百五十一
風送鶯聲過柳堤清曉况逢春色好高筵漸及夕陽西
醉來走筆乘餘興滿眼風光取次題

和胡學士中秋韻

萬里山河拱帝城秋清月色倍分明金莖沆瀣雲中出
銀甕蒲萄雪裏傾幾處歌鐘催曙色千門刻漏送寒聲
玉堂傳得陽春曲更向通衢頌治平

送嗣慶楊先生告老歸鄉

薰風滿路逐鶯聲綠樹紅亭送客行花底退朝雙闕迥

山中歸老一身輕
舊聞潘岳閒多賦
此處龐公厭入城
疎雨滄江分袂處
夕陽回首不勝情

送蕭知州還無為

報政秋來菊未殘
朔風霜冷忽南還
乍辭冀闕天邊路
猶望巢湖水上山
郡邑四時無犬吠
桑麻千里有人閒
探來欲識龔黃事
須訪循良史傳間

送章克安歸紹興因寄聲其兄郎中

明時詔許暫歸休
東入鄉園遂舊遊
岐路獨看征旆去

一樽聊為故人留金臺曉月青霄夢剡曲薰風綠水舟
到日難兄如問訊海天相望思悠悠

送周庶子姪還吉水

今姪遙從故里來秋風又見別金臺謝安本有遊山興
管子能無治世才潞渚蒲帆行處挂文江書室到時開
高堂若問元方信來歲承恩定可回

送楊郎中寧南征

劍佩朝辭虎豹關獨騎驄馬佐平蠻宣威直過牂牁外

卻敵多從俎豆間
潞渚南行三月雨
滇池西去萬重山
明年此際薰風盛
遲爾鳴珂奏凱還

陳廷珪挽詩

編修陳璣之弟也
編修以註誤繫獄
獲釋疾垂殆
其弟訴于主者
得以入視其疾
疾愈而出
遂感疾卒

庾袞情深世所稀
更能相顧到園扉
三年不盡連枝會
萬里空將旅襯歸
草綠寒塘悲暮雨
花殘荊樹怨春暉

不堪灑淚長為客愁向西風見雁飛

墨竹為方教諭玘題

息齋畫竹天下奇短梢亦有凌雲姿晴連淇澳煙霞景
暝入瀟湘風雨時久離林下懷三徑獨向天邊見一枝
王猷清興誰能比歲寒勁節君當知

送沈教授

送君歸去值秋陰三疊陽關酒更斟幾處門牆盛桃李
百年交態重蘭金剩將魏闕恩波意遠慰萱堂離別心

想到家林娛綵後重來莫遣過春深

送伯陽韓御史省墓歸山陰

南臺聲望如君少近沐明恩展祭歸
潞渚霜寒冰欲合
薊門風急雪將飛
青驄蹀躞辭丹闕
金甬輝煌照錦衣
三十年來重交好
臨歧不忍遽相違

送王教授

邊秩承恩歲已闌
曉辭雙闕出燕關
驛程驅馬寒侵骨
芹泮傳經喜在顏
水滿滄江揚子渡
雲連綠樹富春山

荒臺欲訪垂綸處七里灘頭碧草閒

挽莆田方處士

栖遲林壑樂幽閒三徑蕭疎翠竹間石磴穿雲朝采藥
松窗過雨午看山還疑落日携琴去不見滄江罷釣還
何處更尋陶處士空留五柳閉柴關

羅都御史過訪

十年持節鎮邊陲駟馬高車解豸衣名著紫霄凝日彩
令行青塞肅霜威曉馳狼望長臨陣秋覲龍顏暫得歸

寂寞橋門能枉顧
頓令衰朽倍光輝

趙府長史挽詩

久客漳河一望賒
忽聞哀些在天涯
一坏黃壤松楸雨
幾處青衿桃李花
作賦空懷梁苑路
積書猶羨鄴侯家
山陰梅屋留遺跡
秋草萋萋白日斜

寄吳侍郎侍郎嘗許龍尾硯故詩及之

颯風蕭瑟別江干
薊北停車及早寒
把筆常懷龍尾硯
逢人先寄鹿皮冠
右軍只擬臨池試
司寇偏宜退食看

自是文園多病客可能相遣老懷寬

雨中送陳祭酒作迎送曲

迎君雨如絲送君雨如注如此風雨中今宵宿何處

又

迎君欲久留送君留不住今朝與君別不堪風雨路

附胡直

字敬方號西湖吉水人仕至右都御史

立秋後有懷京洛諸故舊

秋序昨夜至炎蒸尚復然青山不改色黃葉墮我前物

性固細微迺得氣之先人生宇宙間俛仰終百年質匪
金石固豈得恒雕鐫朱顏亦易失皤髮無由玄念我三
生友磊落皆俊妍清狂二十載聚散如雲煙高歌白玉
堂隱約青楓顛行止固不偶所賦良由天云何謬一出
凌空失高騫自慚白紛久有負青瑣賢九霄高漠漠千
里情悁悁昨尋東籬菊欲買南山田安分乃吾事富貴
甘棄捐努力事勲業諸公斯勉旃

登石材嶺偶成

驅車市廛間紛紜競馳逐勝地一登臨稍覺舒心目
前乘葛溪險後俯巽峰綠猿啼隔幽渺鳥鳴在空谷
上有千歲松茯苓日堪斲下有百尺潭蛟鼉時潛伏
聞道學仙侶誅茆向其麓求之不可得況可與論宿
擾擾塵世人何為苦羈束願言往從之超然越流俗

其二

蚤讀聖賢書無心志丘壑欲起振橫流翱翔上寥廓
如何中道乖塵事苦羈縛今日旅江臯明日走城郭
杖履

不容遂巾韞豈能却佳晨陟幽巘俗慮俱脫畧緣微度
前嶺跼步登險嶸時秋積雨霽草樹將搖落安得一壺
酒遠與幽人酌浩歌天壤間冥棲有真樂

清虛子

清虛子神仙客妙年出入黃金闕曾侍天壇禮玉皇鶴
氅羽衣金蕩節或隨列禦寇乘風八極中或從赤松子
吐納凌青空三花既結頂五炁仍蟠胸松栢秀媚桃李
容清虛不與流俗同吸沆瀣兮被明月幾見蟠桃千歲

紅我有紫霞想未脫塵外踪有待功成拂衣去桃花源
上期相逢

小孤山

岷嶓水自巴蜀來西江彭蠡亦壯哉衆流于此相會合
滾滾一道由天開控引百川水日夜俱朝宗萬古君臣
義江流無不同兩山相峙青壁立一柱擎天高萬尺間
雲宿霧任往來巨浪驚濤從射激纖綃祇畏蛟魅愁然
犀須恐魚龍泣半山亭榭赤欄干仙女神遊畫往還鸞

鶴何須閨苑風環珮謾許留塵寰我有登高興未獲造
其間絡石吐花碧映水桃竹斑吳公雄筆照絕島邵菴
學士同躋攀風流數老不復見遺餘墨筆留空山遠招
山之靈酹以一壺酒禹公碣石今尚存伏波銅柱終難
朽俛仰人間無盡情萬歲千秋惟爾壽

登望湖亭

朝望湖水平夕瞰湖水清湖天四月南風競滄波萬頃
天冥冥湖間亭榭作何代歷歷江山殊勝槩匡廬山遠

張錦屏五老峰高疊華蓋古人至者應未多傳云已往
惟東坡雄詞健筆映千載只今遺跡留山阿我時來此
已頭白浩歌似覺滄溟窄天空水濶混虛無更闌斗轉
迷南北登臨不盡今古情乘流況欲登蓬瀛聖恩汪濊
似湖水布衣總得諧恩榮遂呼美酒酹江水馮夷起舞
羣龍喜茲行不須乞如願明日乘風過彭蠡

黃氏松竹圖

憶昨謫陽故人邀我遊芙蓉溪蜀葵花開蒲葉齊錦箴瑤

席美清夜醉看明月流天西
芙蓉溪才士淮東客還家暫
息凌雲翮疊巘開屏對畫樓
喬松偃蓋環深宅夙志曾
閒雅結屋亭西頭松篁手自種
九夏如三秋我時醉卧
北窗裏朗吟似覺商飈起
繡棚暗蛻赤龍鱗翠葆曉抽
青鳳尾陽烏漏金光陸離舊葉未落生新枝清音時聞
戛蒼玉倒影忽作玄雲垂
載調綠綺琴和以淇澳篇知
心獨想子猷在林下豈特山
濤賢君家伯仲真連壁昨
者過從應咫尺去年漂泊江
水東幾回悵望長相憶長

相憶可奈何酌君酒為君歌東梁倦客日已老南州故
吏今無多新圖遠寄堪怡悅終當更棹山陰雪擬約
陽再訪君揮毫書徧琅玕節

夜宿嶰空寺

朝從龍濟遊暮投嶰空宿山深風雨來庭戶秋容肅解
巾挂垂蓉裁詩俯修竹寓此適幽情超然脫塵俗

送郭正己南還

年華相見即相違一舸龍江指日歸快意會看鴻鵠舉

愁驚惟羨鷺鷥飛荆揚濡滯三春雨巫峽徜徉幾夕暉
壯歲勝遊今老大白頭甘分故山薇

送徐崇威之京

曉日遲遲送客舟無窮離思逐東流別情盡付樽中蟻
適意深期水上鷗徐樂負才寧自獻彌衡懷刺豈輕投
明時戀闕心偏壯定剖丹衷副衮旒

送見菴胡學士扈從之北京

唐宗才秀喜逢君蚤有聲華海內聞恩渥豈徒親密勿

經綸真足致華勲從容房杜無庸傳激烈歐虞祇自文
此去皇封常有賜遠人寧惜寄微曛

寄鄧給事中子信

金吾往往到巖扃為覘湖山有客星別後鬢華秋易白
把來衫袖曉猶青江都久廢天人策關尹能留老子經
但得羣龍滿朝野鴻飛何必唳蒼冥

瀟湘雨意圖

鷺竹叢深日未晡寒江煙雨翠模糊東風無限瀟湘意

却倚篷窗聽鷓鴣

題貴妃春醉圖

歌罷霓裳一曲歡酒醺無力上雕鞍
侍兒扶起雲鬟側
喜得君王駐馬看

天華晚翠

天華屹立煥金華蒼翠仍宜落日斜
試問謫仙高卧處
一巢今已屬誰家

許由

千古清風一許由
木瓢連掛樹梢頭
若令洗耳聽人世
轉使先生無限愁

白蓮

玉雪肌膚秋水間
碧波深處露雲鬟
巫山十二皆神女
肯逐襄王夢裏還

石倉歷代詩選卷三百五十一